



FRidericus à rubea barba Barbarossa cognominatus, filius fuit Friderici ducis Sueviæ fratris Conradi regis, & Iudithæ Henrici Nigri Noricorū ducis filia. Princeps manu & ingenio strenuus, qui animi & corporis donis ingentibus erat præditus. memoria insigni pollebat, ita ut omnium uerborum, quæ etiam cum mediocris fortunæ homine contulisset, semper recordaretur. Omnibus erat affabilis & mansuetus, & tantum superbis infestus. liberalitate, iustitia, & prudentia omnes alios principes eius temporis superabat. Erat statura procera & optimè constituta, facie eleganti, atq; capillo & barba rufa. Conrado itaque defuncto ab uniuersis

Germaniæ principibus unanimi consensu Francofurti in eius locum Cæsar eligitur. Erat enim is Conradi regis defuncti ex fratre, atq; Guelfonis ex sorore nepos, ita ut duæ illæ potentissimæ familiæ Henricorum & Guelfonum, quæ longas inuicem similtates exercuerant, in unico Friderico coalescerent.